

毛

詩

釋

地

毛詩釋地卷之三

經學叢書之三

南海桂文燦

秦

秦風

鄭氏譜秦者隴西谷名於禹貢近雍州烏鼠之山
堯時有伯翳者實皋陶之子佐禹治水水土既平
舜命作虞官掌上下草木鳥獸賜姓曰嬴歷夏商
興衰亦世有人焉周孝王使其末孫非子養馬於
汧渭之間孝王爲伯翳能知禽獸之言子孫不絕
故封非子爲附庸邑之于秦谷至曾孫秦仲宣王

又命作大夫始有車馬禮樂侍御之好國人美之
秦之變風始作秦仲之孫襄公平王之初興兵討
西戎以拔周平王東遷王城乃以岐豐之地賜之
始列爲諸侯遂橫有周西都宗周畿內八百里之
地其封域東至池山在荆岐終南惇物之野至元
孫德公又徙于雍州云

漢地理志非子邑於秦今隴西秦亭秦谷是也

案今甘肅秦州清水縣西有故秦城爲非子始
封地又陝西鳳翔府隴州南三里有秦城一統
志非子所封二者未詳孰是秦谷蓋在是已今

陝西西安府鄠縣東有鄠國左傳所謂畢原鄠
郇文之昭也卽文王所宅之鄠邑本崇侯虎國
文王克崇而居之故大雅云旣伐于崇作邑于
鄠武王旣遷鎬京卽封其弟于此今鳳翔府岐
山縣爲周西岐之地幽王未陷於犬戎秦襄公
逐戎卽有其地是自今陝西鄠縣西陟渭水至
岐山縣皆平王賜秦襄公地今鳳翔府治鳳翔
縣城南有故雍城卽秦雍都也漢志汧名吳山
在右扶風續漢志汧縣有吳嶽山本名汧職方
雍州其山鎮曰嶽山是也漢汧縣唐汧原縣隴

州治明省縣入今鳳翔府之隴州州南三里有
汧縣故城汧山在州南八十里水經注云汧水
出汧縣之蒲谷薌弦中谷決爲弦蒲藪爾雅曰
水決之澤爲汧也汧水東逕汧縣故城北會龍
魚川水又東會一水發南山西側俗以此山爲
吳山國語所謂虞矣渭水出今陝西臨洮府渭
源縣西烏鼠山東至西安府華陰縣入河荆山
在今陝西西安府富平縣西南十里下有荆渠
岐山在今陝西鳳翔府岐山縣東北四十里一
名天柱山山南爲周原大雅所謂周原膺膺也

終南山在今陝西西安府長安縣南五十里東至藍田縣西至鳳翔府郿縣綿亙八百餘里惇物山漢志屬右扶風武功縣注太壹山古文以爲終南垂山古文以爲惇物皆在縣東漢武功故縣在今陝西鳳翔府郿縣東四十里惇物山在今郿縣東南四十里卽太一之北峰也

阪

車鄰阪有漆

傳陂者曰阪

漢地理志隴西有隴坻在其西注隴阪也卽今隴

山三秦記其阪九回欲上者七日乃越高處東望秦川然則阪固秦地之所有也

通典秦州有大阪名隴坻亦曰隴山

案尙書禹貢織皮西傾因桓是來鄭注桓是隴阪名其道盤桓旋曲而上故名曰桓是今其下民謂是阪曲爲盤也郭仲產秦州記云隴西郡隴山東西百八十里其上懸巖吐溜北人升此而歌曰隴頭流水流離四下念我行役飄然曠野登高遠涕零雙墮鄭所謂桓是隴阪名者蓋卽隴山後漢隗囂傳謂之隴坻李賢注云坻阪

是已諸書言此阪大率皆就今鞏昌府隴西縣東至隴州汧陽一路而言禹貢言由西傾因阪以浮于潛水則當由今洮州廳東北行歷鞏昌府之漳縣伏羌縣秦州之禮縣至西和縣浮西漢水以入沔也是則秦阪卽此道與

西戎

小戎序美襄公也備其兵甲以討西戎西戎方強而征伐不休國人則矜其車甲婦人能閑其君子焉在其板屋

傳西戎板屋

漢地理志天水隴西山多林木民以板爲室屋及安定北地上郡西河皆迫近戎狄修習戰備高上氣力以射獵爲先故秦詩曰在其板屋又曰王于興師修我甲兵與子偕行及車轡四載小戎之篇皆言車馬田狩之事漢興六郡良家子選給羽林期門以材力爲官名將多出焉又匈奴傳秦襄公伐戎至邽始列爲諸侯

後漢西戎傳秦襄公攻戎救周及平王之末戎逼諸夏自隴山以東及乎伊洛往往有戎於是渭首有狄獯邽冀之戎涇北有義渠之戎洛川有大荔

之戎渭南有驪戎伊洛間有楊拒泉皋之戎頽首
以西有蠻氏之戎

案西戎蓋今甘肅河州以西諸西番也漢天水
郡今甘肅甯遠伏羌兩縣南至禮縣西和兩縣
地漢隴西郡今甘肅洮州廳岷州東至渭陽秦
州等州縣地漢安定郡今甘肅固原州西至靜
甯州地漢北地郡今甘肅安化縣東至陝西中
部縣地漢上郡今山西神木府谷等縣地漢西
河郡今山西甯鄉北至臨縣興縣地六郡裒裘
二千餘里周時西戎蓋竄居于此襄公備兵甲

以討之

終南

終南終南何有有紀有堂

傳終南周之名山中南也紀基也堂畢道平如堂也箋畢也堂也亦高大之山所宜有也畢終南之道名邊如堂之牆然

尚書禹貢終南惇物至于鳥鼠鄭注地理志終南惇物皆在右扶風武功也

左氏昭四年傳荆山中南九州之險也注在始平武功縣南

漢地理志右扶風武功大壺山古文以爲終南
郡縣志終南山在京兆府萬年縣南五十里一名
太一亦名終南

按今陝西鳳翔府郿縣東四十里有漢武功故
縣在渭水南或以今武功縣在渭水北者當之
誤也終南山橫亘關中以南西起秦隴東徹藍
田凡雍岐鄠鄠長安萬年相去八百餘里連綿
峙據其南者皆此山也此山雖廣然太一一峰
最高故漢志以太一當之

渭陽

渭陽曰至渭陽

箋渭水名也秦是時都雍至渭陽者蓋東行送舅氏于咸陽之地

水經渭水逕長安城北注卽咸陽

案咸陽本秦舊縣渭水南去縣三里秦咸陽在今陝西咸陽縣東二十二里

陳

陳風

鄭氏譜陳者大皞虞戲氏之墟帝舜之胄有虞闕父者爲周武王陶正武王賴其利器用與神明之

後封其子嬀滿於陳都於宛丘之側是曰陳胡公
以備三恪妻以元女大姬其封域在禹貢豫州之
東其地廣平無名山大澤西望外方東不及明緒
大姬無子好巫覡禱祈鬼神歌舞之樂民俗化而
爲之五世至幽公當厲王時政日衰大夫荒淫所
爲無度國人傷而刺之陳之變風作矣

漢地理志大姬婦人尊貴好祭祀用史巫故其俗
巫鬼陳詩曰坎其擊鼓宛丘之下以冬以夏值其
鷺羽又曰東門之枌宛丘之栩子仲之子婆娑其
下此其風也吳札聞陳之歌曰國亡主其能久乎

自胡公後二十三世爲楚所滅

通典陳州宛丘縣陳都

案今地見上

宛丘

宛丘宛丘之上兮

傳四方高中央下曰宛丘

爾雅陳有宛丘注今在陳郡陳縣

案今河南陳州府治淮甯縣卽古陳縣宛丘卽

在城中已

東門之池

東門之池東門之池

傳東門國之交會池城池也

水經注陳城故陳國也東門內有池池水東西七十步南北八十許步水至清潔而不耗竭不生魚草水中有故臺處詩所謂東門之池也

案今河南淮甯縣爲陳國故城池卽在府城東

門內

墓門

墓門墓門有棘

傳墓門墓道之門

楚辭天問王逸注晉大夫解居父聘吳過陳之墓
門見婦人負其子欲與之淫泆婦人引詩刺之曰
墓門有棘有鴉萃止

列女傳陳辯女陳國采桑之女也爲歌曰墓門有
棘墓門有梅

案楚辭王注墓門蓋陳之城門或郭門也猶左
傳言秦師過周北門此與傳說異當是魯詩之
說王注多魯詩說也襄三十年左氏傳晨自墓
門之漬入注墓門鄭城門猶魯有鹿門齊亦有
鹿門齊有揚門宋亦有揚門也王尚書說

防邛

防有鵲巢防有鵲巢邛有旨若

傳防邑也邛丘也

續郡國志陳國陳縣注引博物記曰邛地在縣北
防亭在焉

案今河南淮甯縣卽古陳縣防邑邛丘俱在縣
北境已

株林

株林胡爲乎株林

傳株林夏氏邑也

續郡國志陳縣注陳有株邑蓋朱襄之地

寰宇記夏亭城在陳州西華

王氏原引縣西南三
作南頓誤

十里陳詩胡爲平株林今此城北五里有株林卽
夏氏邑一名華亭

郡縣志宋州柘城縣本陳之株邑詩株林是也故
柘城在甯陵縣南七十里陳之株邑

案國語單襄公假道于陳道路若塞野場若塞
民將築臺于夏氏其下乃言及陳可證夏氏之
邑在國都外爾雅邑外曰郊郊外曰牧牧外曰
野野外曰林此言百里之國五十里之界界各

得十里株林蓋野外之林也序言朝夕而往似
宜近而不宜遠古陳國爲今淮甯縣西華縣在
縣西八十里夏亭又在縣西南三十里相去一
百一十里豈朝夕所能往乎若今柘城縣在淮
甯東北四五十里其爲古之株林無疑已

檜

檜風

鄭氏譜檜者古高辛氏火正祝融之墟國在禹貢
豫州外方之北滎波之南居溱洧之間祝融氏名
黎其後八姓唯妘姓檜者處其地焉周夷王厲王

之時檜公不務政事而好絮衣服大夫去之於是
檜之變風始作其國北鄰于虢

左傳國語作鄆

鄭語妘姓檜注陸終第四子求言爲妘姓封于鄆
鄆今新鄭縣也

說文艷祝融之後妘姓所封澠洧之間鄭滅之

水經注竹書紀年晉文侯二年同王子多父伐鄆
克之乃居鄭父之丘名之曰鄭是曰桓公又云洧
水又東南逕鄆城南注劉禎云北鄰于虢

括地志鄆城在鄆州新鄭縣東北二十二里

郡縣志作

三十
二里

通典河南府密縣古鄆國有洧水鄆水鄭州新鄭縣有溱洧二水本鄆國之地

案古鄆城在今河南開封府密縣東北外方今中嶽嵩山在河南河南府登封縣北十里西接洛陽縣北接鞏縣東接開封府密縣界綿亘一百五十里滎波澤在今河南開封府滎陽縣南三里古城村鄭譜云豫州外方之北當云豫州之北外方之東也

曹

曹風

鄭氏譜曹者禹貢兗州陶丘之北地名周武王既
定天下封弟叔振鐸于曹今日濟陰定陶是也其
封域在雷澤荷澤之野十一世當周惠王時政衰
昭公好奢而任小人曹之變風始作

正義曹都雖在濟陰其地則踰濟北

輿地廣記廣濟軍定陶縣故三朷國周封曹叔振
鐸于此

郡縣志古曹國在曹州濟陰縣東北四十七里自
曹叔至伯陽凡十八葉

案今山東曹州府定陶縣西北四里有定陶故
城卽古曹國也陶丘在今定陶縣西南七里漢
志濟陰郡成陽禹貢雷澤在西北當在今山東
濮州境也其水湮矣又漢志濟陰禹貢荷澤在
定陶東山陽郡湖陵禹貢浮于泗淮通于河水
在南河澤蓋今山東定陶縣夏月湖也通于河
河卽荷澤水今夏月湖東流曰萬福河其下流
至魚臺縣爲昭陽湖蓋其故瀆也

南山

侯人南山朝隋

傳南山曹南山也

左氏僖十九年宋人曹人邾人盟于曹南

郡縣志曹南山在曹州濟陰縣東二十里詩南山

朝濟是也

寰宇記作
在縣東南

案今山東曹州府曹縣南八十里有曹南山左

傳曹南王伯厚顧震滄竝以爲卽此是也

邠

下泉邠伯勞之

傳邠伯邠侯也箋文王之子爲州伯

左氏僖二十四年傳軍于邠服虔注邠國在解縣

東郇瑕氏之墟也注解縣西北有郇城

春秋釋地同

水經注涑水西逕郇城郇伯故國也解故城東北

二十四里有故城在猗氏故城西北俗名郇城

輿地廣記河中府猗氏縣有郇城文王子所封詩

郇伯

案今山西蒲州府臨晉縣東北十五里有郇城

卽古郇國也

幽

幽風

鄭氏譜幽者后稷之曾孫曰公劉者自郇而出所

徙戎狄之地名今屬右扶風栒邑公劉以夏后太
康時失其官守竄于此地猶修后稷之業勤恤愛
民民咸歸之而國成焉其封域在禹貢雍州岐山
之北原隰之野至商之末世太王又避戎狄之難
而入處于岐陽民又歸之公劉之出太王之人雖
有其異由有事難之故皆能守后稷之教不失其
德成王之時周公避流言之難出居東都二年思
公劉太王居邠之職憂念民事至苦之功以比序
已意後成王迎而返之攝政致太平其出入也一
德不回純似于公劉大王之所爲太師大述其志

主意于豳公之事故別其詩以爲豳國變風焉
國語周語夏之衰不窋窋戎狄之間韋昭注豳西
近戎北近狄

漢地理志昔后稷封釐公劉處豳大王徙邠文王
作鄴武王治鎬其民有先王遺風好稼穡務本業
故豳詩言農桑衣食之本甚備右扶風栒邑縣有
豳鄉詩豳國公劉所都徐廣曰漆縣東北有豳亭
說文邠周太王國在右扶風美陽豳美陽亭卽豳
也民俗以夜市有豳山

通典邠州古豳國

郡縣志古幽城在幽州三水縣西三十里公劉始都之處又慶州宏化縣東南三里有不窋故城

案邠幽古今經傳竝通用以偏旁考之邠从邑蓋地名幽从山蓋山名而二者又相因故說文二篆竝列也古漆縣今陝西邠州直隸州棗邑今州屬三水縣邠州東北有幽亭幽谷三水縣西有古幽城是也慶州宏化縣今陝西慶陽府治安化縣也不窋城在府境內府東三里有不窋冢

東山

東山我徂東山

論語季氏篇顓臾爲東蒙主孔注使主祭蒙山也
皇邢二疏並云蒙山在東故云東蒙主

孟子盡心篇孔子登東山而小魯

水經琅瑯郡臨沂縣有洛水出太山南武陽之冠
石山一名武水東流過蒙山下有蒙祠又東南逕
顓頊城卽孔子稱顓臾爲東蒙主也

案東山卽蒙山也在今山東蒙陰縣南八里

四國

破斧四國是皇

傳四國管蔡商奄也

案地理志鄭氏譜並言河內本殷之舊都周既滅殷分其畿內爲三國邶鄘衛是也邶以封紂子武庚鄘管叔尹之衛蔡叔尹之以監殷民謂之三監書序曰武王崩三監畔周公誅之是也今河南衛輝府東北有故邶城卽商國也府城西又有故鄘城卽管國也衛輝府淇縣東北有朝歌故城後爲衛康叔始封之地卽蔡國也成王伐淮夷遂踐奄因以封周公蓋周公已封于武王時而成王以奄地益之也今山東兗州府

曲阜縣舊城卽古奄國地或言奄城在縣東二里按左氏僖二十四年傳管蔡邠霍文之昭也注管國在滎陽京縣東北今河南開封府鄭州廢管城是也隱四年傳於是陳蔡方睦于衛注蔡今汝南蔡上縣歷代相沿今上蔡屬河南汝甯府縣西南十里有故蔡國城昭元年傳遷闕伯于商丘注宋地春秋釋例云宋商商邱三名一地梁國睢陽縣也明時始置商丘縣今屬河南歸德府治定四年傳因商奄之民注商奄國名今山東兗州府曲阜縣舊城卽古奄國地商

本商時諸侯成王滅之以其地封魯者也

毛詩釋地卷三

毛詩釋地卷四

經學叢書之三

南海桂文燦

混夷

采薇序文王之時西有昆夷之患

箋昆夷西戎也

大雅緜混夷駟矣

箋混夷夷狄國也

孟子梁惠王篇文王事混夷注詩云混夷兇矣唯其喙矣謂文王也

帝王世紀文王受命四年周正丙子混夷伐周一

日三至周之東門文王閉門修德而不與戰

案昆夷混夷卽西戎其地漢爲右扶風漆縣今爲陝西邠州也

獫狁

靡室靡家獫狁之故

左氏閔二年傳虢公敗犬戎于渭汭注犬戎西戎別在中國者

史記匈奴傳唐虞以上有山戎獫狁葷粥居于北蠻

漢書匈奴傳武王伐紂而營雒邑復居于酆鎬放

逐戎夷涇洛之北以時入貢召曰荒服懿王時戎狄交侵暴虐中國詩人始疾而歌之曰靡室靡家玁狁之故

案穆天子傳天子至于雷首犬戎胡觴天子于雷首之阿雷首山在今山西蒲州府絕流爲陝西華陰渭水入河之處是犬戎在渭汭也

朔方

出車往城于方

傳方朔方

城彼朔方

傳朔方北方也箋王使南仲爲將率往築城于朔方爲軍壘以禦北狄之難

案大雅溥彼韓城王肅云今涿郡方城縣有韓城世謂寒號非也水經注聖水經方城縣故城北又東南經韓侯城東詩溥彼韓城燕師所完今順天府固安縣有方城村卽漢方城縣地南仲築城蓋卽在此後人名之曰方城漢時因以置縣也

北山

杕杜北山陟彼北山

南山有臺北山有萊

左氏昭公二十二年傳王由于北山注洛北芒也
案芒山一作邙山一曰平逢山亦曰邾山亦曰
太平山今在河南河南府城洛陽縣東北連偃
師孟津鞏三縣界汲冢周書作雒解云周公作
大邑成周于土中城方千七百二十丈郭方七
十里南繫于洛水北因于邾山卽此山也

南山

南山有臺

斯于幽幽南山

言部北卷四
三
節南山節彼南山

蓼莪南山烈烈

信南山信彼南山

案南山終南山也終南山橫亘關中以南西起秦隴東徹藍田凡今雍岐郿鄠長安萬年諸縣相去八百餘里連縣峙據其南者皆此山也此山雖廣然太一一峰最高故漢志以太一當之四海

蓼蕭序澤及四海也

箋九夷八狄七戎六蠻謂之四海國在九州之外

雖有大者爵不過子虞書曰州十有二師外薄四海咸建五長

爾雅釋地九夷八狄七戎六蠻謂之四海郭注九夷在東八狄在北七戎在西六蠻在南次四荒者案九夷在東今朝鮮日本地八狄在北今内外蒙古地七戎在西今新疆地六蠻在南今大江以南之地

焦穫 鎬 方

六月整居焦穫侵鎬及方 來歸自鎬

傳焦穫周地接于獫狁者鎬鎬也方也皆北方地

名劉向疏云吉甫之歸周厚賜之其詩曰來歸自鎬千里之鎬猶以爲遠鎬去京師千里顏師古注鎬非豐鎬之鎬

爾雅釋地周有焦穫孫炎曰周岐周也郭璞曰今扶風池陽水瓠中是也

水經沮水注云沮水東注鄭渠渠首上承涇水于中山西邸瓠口所謂瓠中也爾雅以爲周焦穫矣郡縣志焦穫藪亦名瓠口卽鄭白二渠也

案晉之扶風郡池陽縣今爲陝西西安府三原涇陽二縣之地如郭注之說與劉向之說違矣

孔疏亦據郭說毛鄭詩考正云今之西安三原縣漢屬左馮翊是直逼周京矣非也既整其眾處于焦獲乃侵鎬及方至于涇陽則焦獲在外鎬方涇陽在內下章言薄伐玁狁至於太原卒章言來歸自鎬則焦獲鎬方在太原涇陽之間王師逐之至太原後仍軍於鎬然後歸也謹案戴說是也涇陽漢安定郡朝那涇陽二縣今爲甘肅平涼縣太原漢安定郡高平縣今爲甘肅固原州竝在今陝西長安縣西北八九百里劉向言去京師千里者舉大數也

三言釋地卷四
五
涇陽

至于涇陽

寔涇水之北正義水北爲陽

漢地理志安定郡涇陽開頭山在西禹貢涇水所
出東南至陽陵入渭過郡三行千六百里雍州川
郡縣志原州平涼縣本漢涇陽縣地

案今涇水出甘肅平涼縣笄頭山東南流至陝
西高陵縣入渭則涇陽者今甘肅平涼縣也

太原

至于太原

國語周語宣王料民于太原

後漢書西羌傳穆王西征犬戎獲其五王遂遷戎于太原又云夷王命虢公率六師伐太原之戎至于兪泉又云宣王二十七年遣兵伐太原戎不克汲冢周書略同

案國語後漢書所言夷王穆王宣王料民伐太原戎事與詩相合此皆詩之太原也或以此太原爲卽禹貢太原乃今山西太原府曲陽縣日知錄曰必求涇陽所在而後太原可得而明漢書地理志安定郡有涇陽縣郡縣志原州平涼

縣水漢涇陽縣地然則太原當卽今之平涼而後魏立爲原州亦是取古太原之名爾計周人之禦獫狁必在涇原之間若晉陽之太原在大河之東距周京千五百里豈有寇從西來兵從東出者乎謹案顧說是也後魏原州後廢唐徙治平涼州西去故州一百六十里故州卽今甘肅平涼府固原州也

蠻荆 蠻髦 蠻方

采芑蠢爾蠻荆

傳蠻荆州之蠻也

角弓如蠻如髦

傳蠻南蠻也髦夷髦也箋髦西夷別名武王伐紂其等有八國從焉

大雅抑篇用邊蠻方

箋蠻方蠻畿之外也

尚書禹貢荒服三百蠻牧誓及庸蜀羌髳微盧彭濮人國語鄭語史伯曰當成周者南有荆蠻叔熊逃難於濮而蠻蠻半蠻矣晉語叔向曰昔成王盟諸侯於岐陽楚爲荆蠻置茅蘊設望表與鮮牟守燎故不與盟吳語有蠻荆之虞

後漢南蠻傳槃瓠後滋蔓今長沙武陵蠻是也周
世黨眾彌盛宣王中興乃命方叔南伐蠻方詩人
謂蠻荆來威又西羌傳武王伐商羌髦率師會牧
野

括地志姚府以南古髦國之地有髦州

案荊州今湖北湖南也今湖南長沙府以南皆
古羣蠻之地髦在巴蜀漢之巴郡所治江州縣
也今爲四川重慶府巴縣

甫草

車攻東有甫草

韓作圃草鄭箋云圃田之草也

周禮職方氏河南曰豫州其澤藪曰圃田

爾雅釋地鄭有圃田

漢地理志河南郡中牟圃田澤在西豫州藪

案圃田澤在今河南開封府中牟縣地

敖

薄獸于敖

傳敖地名箋敖鄭地今近滎陽

左氏宣十二年傳晉師在敖郛之間注二山在滎陽縣西北傳又云士季設七覆于敖前馬氏補注

引酈道元曰潞石谿水出滎陽城西南李澤東北
流厯敖山南春秋晉楚之戰設伏于敖前謂是也
續漢書郡國志河南滎陽縣有敖亭劉昭補注云
周宣王狩于敖

案今河南開封府滎澤縣西北十五里有敖山
秦于其地沿河置倉名曰敖倉北臨汴水酈生
說漢高據敖倉之粟卽此

漆沮

吉日漆沮之從

傳漆沮之水麇鹿所生也

大雅縣自土沮漆

傳沮水漆水也

周頌潛猗與漆沮

傳漆沮岐周之二水也

尙書禹貢雍州漆沮既從導渭又東過漆沮

漢地理志北地郡直路沮水出東西入洛

東西當作西東

右扶風杜陽縣杜水南入渭詩曰自杜顏氏注詩

自土沮漆詩作自杜言公劉避狄而來居杜與漆

沮之地漆縣水在縣西

說文漆水出右扶風杜陽岐山東入渭

水經漆水出扶風杜陽縣俞山東北入于渭沮
水出北地直路縣東過馮翊殺胡縣北東入于洛
案今沮水出陝西中部縣西境東流入洛杜水
卽陝西麟游縣石白水南流入渭蓋絕成國渠
而過也今漆水出陝西永壽縣西境其水南流
與石白水合石白水入渭漆水與石白水合故
山海經水經說文皆云漆水入渭漢志言杜水
入渭則漆水入杜也此詩漆水沮水杜水之源
流也禹貢言漆沮并入渭而漢志水經則言沮
水入洛者周禮職方氏雍州浸之洛及漢志北

地郡歸德之洛水左馮翊襄德之洛水卽今出
甘肅安化縣北境東南流之洛水乃北地郡直
路沮水之下流虞夏之時統名曰沮水無洛水
之稱故禹貢雍州有沮無洛沮自入渭其所稱
洛皆河南之洛耳至漢志襄德洛水云入渭而
歸德洛水又云入河者蓋今陝西朝邑縣南華
陰縣北渭洛交流禹時沮水今日洛河必先入渭而
而後入河漢時則分爲二派故班志並紀之至
今日而東南入渭之瀆已湮洛止入河與古異
也

沔水

沔水沔彼流水

晉語公子賦河水韋注河當作沔字相似誤也

漢地理志武都郡沮 沮水出東狼谷南至沙羨

南入江過郡五行四千里荊州川 武都郡武都

東漢水受氏道水一名沔過江夏謂之夏水入江

案沮水今陝西沔縣上沮水出縣北境山下流

爲東漢水東南流至湖北江夏縣入江也

宗周

正月赫赫宗周

傳宗周鎬京也

漢地理志初雒邑與宗周通封畿東西長而南北短短長相覆爲千里

說文鎬武王所都在長安西上林苑中

案鎬故城在今陝西長安縣西南三十二里

褒

褒姒威之

傳褒國也姒姓也威滅也有褒國之女幽王惑焉而以爲后詩人知其必滅周也

晉語周幽王伐有褒

鄭語褒人褒姒

水經注石門在漢中之西褒中之北褒水又東南
歷褒口卽褒谷之南口也北口曰褒斜水又南涇
褒城縣故城之東褒中縣也本褒國又南流入於
漢南鄭縣故褒之附庸周顯王之世蜀有褒漢之
地至六國楚人兼之懷王哀秦略取焉

輿地廣記興元府褒城縣故褒國漢置褒中縣
括地志褒國故城在縣東二百步

案漢褒中縣今陝西褒城縣也

向

十月之交作都于向

傳向邑也

左傳襄十一年傳諸侯伐鄭師于向注向地在潁川長社縣東北

水經注云向城北向岡

九域志同州有向城詩作都于向謂此

案今河南開封府尉氏縣西南四十里有向城水經注向岡卽在城側

蘇暴

何人斯序蘇公刺暴公也暴公爲卿士而諧蘇公焉

故蘇公作是詩以絕之

箋暴也蘇也皆畿內國名

左氏隱三年傳四月鄭祭足帥師取溫之麥注溫
今河內溫縣釋例土地名曰溫蘇二名河內溫縣
又莊十九年傳出奔溫注溫蘇氏邑

春秋文八年公子遂會雒戎盟于暴注鄭地范甯
穀梁注同

又成十五年傳楚子侵鄭及暴隧

路史暴辛公采地鄭邑也一名暴隧周圻內邑

案蘇卽溫也一地二名溫縣今屬河南懷慶

古溫城在縣西南三十里暴隧今在懷慶府原
武縣境與溫接壤也

有北

巷伯投畀有北有北不受

傳北方寒涼而不毛

案有北蓋今內外蒙古地也

淮水

鼓鐘淮水湯湯

尚書禹貢導淮自桐柏東會于泗沂東入于海

漢地理志南陽郡平氏 禹貢桐柏大復山在東

南淮水所出東南至淮陵入海過郡四行三千二百四十里青州川

案今淮水出河南桐柏縣桐柏山東流至江蘇安東縣入海志文淮陵蓋淮浦之譌或睢陵之譌也

洛

瞻彼洛矣

傳洛宗周漑浸水也

周禮職方氏正西曰雍州其浸渭洛注洛水出懷德

漢地理志北地郡歸德洛水出北蠻夷中入河

左馮翊襄德洛水東南入渭雍州寢

說文洛水出馮翊歸德北夷畛中東南入渭

案洛水有二一爲河南之洛禹貢導洛自熊耳

職方豫州川漢志宏農郡上雒今出陝西雒南

縣冢領山東北流入河者是也一爲河北之洛

禹貢漆沮之沮職方雍州浸漢志歸德襄德今

出甘肅安化縣北境東南流入河者是也序以

此詩爲刺幽王而思古明王能爵命諸侯賞善

罰惡則此乃西京之詩洛益雍州之浸矣漢志

既云洛入河又于襄德下云入渭者蓋洛水至
今陝西朝邑縣南分二派一東入河一南入渭
今入渭之瀆已湮惟存入河一派耳說文云洛
入渭者凡水分派許君不兩著但紀其一故未
備也

鎬

魚藻王在在鎬

箋武王處于鎬京樂八音之樂與羣臣飲酒而已
大雅文王有聲鎬京辟離

傳武王作邑于鎬京

三輔決錄云鎬在豐水東豐在豐水西相去二十五里自漢武帝穿昆明池于此鎬京遺址淪陷焉
案鎬京在今陝西西安府長安縣南三十里

謝

黍苗肅肅謝功

傳謝邑也

大雅崧高于邑于謝南國是式

傳謝周之南國也

鄭語桓公曰謝西之九州何如史伯曰惟謝邾之間是易取也注云謝申伯之國今在南陽謝西有

九州一千五百家曰州邾南謝北號鄆在焉

續郡國志南陽郡宛縣本申伯國棘陽縣東北百里有謝城

水經注泚水又西南流謝水注之水出謝城北建武十三年樊重少子丹爲謝陽侯卽其國也

輿地廣記棘陽故謝國漢爲棘陽縣屬南陽其後省故城在今唐州湖陽縣西北

案漢宛縣今河南南陽縣棘陽縣今河南新野縣也古謝城在今南陽府鄧州境鄧州之東南卽新野縣西北也

北流

白華澆池北流

傳澆流貌箋豐鎬之間水北流

漢地理志右扶風鄠縣鄠水出東南又有潒水皆北過上林苑入渭

說文潒水出右扶風鄠北入渭

水經渭水又東過槐里縣又東潒水從南來注之渭水又東合甘水又東豐水從南來注之渭水又東北與鎬水合

上林賦曰終此灊澆出入涇渭鄠鎬潦潒紆餘委

蛇經營乎其間蕩蕩乎八川分流相背而異態潘
兵關中記曰涇渭灞澹豐鎬潦湔所謂八川李善
曰潦卽澇水也

案今渭水東經陝西鄠縣北境澇水自南來注
之又東行澧水自南來注之東又有瀉水瀉水
合流曰交水注澧北入渭東又有旱河北流入
渭凡此諸水皆源出終南鄭君所謂豐鎬之水
北流者也

荆舒

漸漸之后序下國刺幽王也戎狄叛之荆舒不至乃

命將率東征役久病於外故作是詩也

箋荆謂楚也舒舒鳩舒鄯舒庸之屬

魯頌閟宮荆舒是懲又及彼南夷

傳南夷荆楚也

左氏桓二年傳始懼楚也注楚國今南郡江陵縣
北紀南城也又莊十年荆敗蔡師于莘注荆楚本
號後改爲楚又僖三年徐人取舒注舒國今廬江
舒縣又文十二年傳羣舒叛楚注羣舒偃姓舒庸
舒鳩之屬廬江有舒城舒城西南有龍舒

漢地理志成王封熊繹於荆蠻爲楚子居丹陽又

南郡江陵縣故楚郢都楚文王自丹陽徙此又廬
江郡舒縣故舒國龍舒縣羣舒之邑

案楚熊繹始封丹陽故城在今湖北宜昌府歸
州東七里後又徙枝江亦曰丹陽則今荊州府
枝江縣至文王徙都於郢則在今荊州府治江
陵縣北也漢舒縣故城在今安徽廬江縣西今
安徽安慶廬州二府及六安州皆古羣舒之地